

BATAKURU PUULUSA HAA E BE EFEESI BEN

1 ¹ Immorde e an min Puulusa, mo Alla hoddiri wonugol *sahaabaajo Iisaa Almasiihu on, haa e bee yimbe Alla, sella-findeebe e nder humondiral mabbe e Iisaa Almasiihu on, wonbe Efeesi. ² Yo moyfere e guttu wonan on immorde e Alla Baaba men, e Iisaa Almasiihu Joomi on.

Fii Barkiji Immorde e Iisaa Almasiihu on

³ Mantoore wonanii Alla, Ben Iisaa Almasiihu Joomi men on, on Hebbindo en kala barki iwruki e Alla ka kammuuli sabu Almasiihu on.⁴ Ko sabu makko Allaahu on subori en ko adii fuddoode aduna on, fii no woniren laabube, be aldaa e ella yeeso makko. E nder giggol makko ngol ⁵ o muuyanno en wonugol be makko sabu Iisaa Almasiihu on, wano o faaliraa non e nder ebboore makko moyfere nden,⁶ fii no mantiren mangu sulfu makko mo o yediri en yidaado makko on.⁷ Ko e nder humondiral e makko sottiraden yiyan makko dan, ko dan hebirden yaafuyee junuubaaji no yaadiri e ngalu sulfu makko,⁸ mo Alla wadiri e hoore men faamu yaajungu e hakkil timmuki, haa yoni. ⁹ O andinii en gundoo kodduruyee makko on, no yaadiri e faale makko moyyo, mo o ebbirnoo Iisaa Almasiihu on on,¹⁰ fii huuwugol mo, nde saa'i on timmoysi, mottindira kala ko woni ka kammuuli e ka hoore leydi, wada di ley yeesoojo gooto, dun ko *Almasiihu on.

¹¹ Enen humondirbe e Almasiihu on ben, en subaama fii wonugol be makko e nder muuyiraneede ebboore on Timminiroowo kala huunde no yaadiri e anniye faale makko on,¹² fii no menen bee attiibe tanyinorde Almasiihu on men mantira mangu makko ngun.¹³ Onon kadi hidon e makko, bay on nanii daaluyee goongaajo on, dun ko kibaaru hisindo on on. Onon kadi on gomdinii, awa kadi Alla wadii *Ruuhu Seniido on maande e mon, dun ko on mo fodanodon.¹⁴ Ko on Ruuhu woni

seeke ndondi men ndin, haa nande cottudi ɓen ɓe Alla subii tabiti, fii mantugol mangu makko ngun.

Fii no Puulusa Du'orani ɓen Efeesi ɓen

¹⁵ Ko dun wadi si min kadi, ɓay mi nanii fii ko gomdindon Iisaa Joomi on kon, e giggol ngol yidusdon yimbe Alla ɓen fow ngol, ¹⁶ mi alaa fowtaade e jarnugol Alla fii mon, mi maandinii kadi fii mon e nder torndeeji an din, ¹⁷ fii no Jom Mangural ngal, dun ko Alla Iisaa Almasiihu Joomi men on, okkira on ruuhu wondudo e faamu e fejnjinaneede, fii no andiron mo, ¹⁸ e yo o hentin giide berde mon den, fii no andiron on tama'u mo o noddi on fii mun, e no andiron ngalu darja ndondi makko ndin e hakkunde yimbe Alla ɓen, ¹⁹ e no andiron mangu bawgal makko feyyitngu wongu gollude e men ngun, enen bee gomdinbe. Ko ngal bawgal o huutori doole makko den ²⁰ fewndo o immintini Iisaa Almasiihu on e hakkunde maybe ɓen, o joddiniri mo ka sengo makko jaamo ka kammuuli. ²¹ O wadi mo e dow kala laamu, e kala ko jogii mbawdi, e kala ko jogii doole, e kala ko ardotoo, e hoore kala innde waaweteende janteede, hinaa non e oo aduna fewndiido hande on tun, kono hay e aduna aroyoowo on. ²² O wadi fow e ley koyde makko, o toddii mo kadi Hooreejo Toowudo fii *moftal ngal.²³ Ko ngal moftal woni bandu makko ndun, ngal hebbiniraama on Hebbinoowo fow e noone fow.

Fii Wurnitideede e Almasiihu on

2 ¹ Onon non hari on maayii sabu bonnereeji mondin e junuubaaji mon din, ² di wuurundon e mun, fewndo jokkunodon laawol oo aduna, wondude e bawgal oo lando jinnaaji din. Ko ruuhu on lando woni gollude e ɓen yeddube jooni. ³ En fow kadi hidan tawdanoo e mabbe, hari hidan jokkunoo himmeeji bandu, hidan jokkunoo faaleeji bandu men ndun e miijooji men din, hari ko en mbaadi faybe handunoobe e tikkere wa beya.

⁴Kono Alla ko Heewudo yurmeende. Ko sabu giggol makko mawngol, ngol o yidî en ngol, ⁵o wurnintinidii en e *Almasiihu on, enen bë tawata maayiino sabu bonnereeji men din: ko sulfu makko on dandiradon. ⁶O immintinidii en e Iisaa Almasiihu on, o joddindinii en e makko ka kammuuli, ⁷fii no o fejñinira ka jamaanuuji aroyaydî ngalu sulfu makko feyfytungu ngun e nder moyfuki makko ki yediraden Iisaa Almasiihu on.⁸Ko sulfu on dandiradon sabu gomfinal ngal, dñun non hinaa e mon iwri, kono ko dokkal Alla. ⁹Hinaa sabu kuude den few fii wota gooto mawnintino.¹⁰Ko fii ko en tagudi makko. Ko e humondiral men e Iisaa Almasiihu on tagaden fii no wadiren kuude moyye, de kanko Alla o ebbunoo gila law.

Fii no Wodditiiibe ñen e Badiibe ñen Wadira Gooto

¹¹Awa, onon bee bë wonaa Yahuudiyanke e lejol, bë *Yahuudiyankeebë wi'ube no sunninaa jogitori wa bë sunninaaka, hara kambe non, ko bë sunninaa ka bandu kon, ko ko wadira juude neddanke, anditee wonde: ¹²hari on alaa Almasiihu, on jeyaaka e leydi Isra'iila ndin, hari ko on jananbe e telen-ma *ahadiiji fodaari ndin, bë aldaa e tama'u, bë alaa Alla e oo aduna. ¹³Kono jooni non, sabu Iisaa Almasiihu on, onon wodditinoobe ñen on wontii badiibe rewru e yiyan Almasiihu on.

¹⁴Ko fii ko kanko woni buttu men on, on wadudo didooobe ñen gooto, on libirdo maadi ngayngu heedunoondi bë ndin okkitirgol bandu makko ndun. ¹⁵O mehindinii Sariya on e yamirooje mun ñen e farillaaji mun din fii yo o sincir ñen dido aaden gooto keso humondirdo e makko.Ko nii o woni tabintinirde buttu, ¹⁶o moyfintina hakkunde mabbe e Alla, kambe dido bë wona bandu wooturu rewru e *leggal altindiraangal ngal o wariri ngayngu ngal. ¹⁷O ari, o waajii on onon wodditinoobe ñen buttu, o waajii battiibe kadi ñen buttu, ¹⁸ko fii rewru e makko en fow hidem mari naatirgal takko Baabaajo on e nder Ruuhu gooto.

¹⁹ Kodun wadi, hinaa on jananbe hande kadi, maa tujarankeebé, kono ko on jeydube e yimbe Alla ben, tawdaabe e suudu Alla ndun, ²⁰ darnaabe e hoore didol sahaabaabe ben e annabaabe ben, tawi ko Iisaa Almasiihu on tigi woni hayre nden ka sobbundu. ²¹ Ko e makko kala mahoodi yubbindiraandi no moyýiri bantorta, wona nokkuure hormorde fii Joomiraado on. ²² Onon kadi, hicdon mahideede e makko fii no woniron wonunde nde kanko Alla o hodiri Ruuhu makko on.

Fii no Puulusa Fejjiniri Gundoo Alla on

3 ¹ Sabu dun, min Puulusa, oo kasoojo Iisaa Almasiihu on fii mon, onon be wonaa Yahuudiyanke ben, ² mido tanyinii, on nanii fii dee golle moyýere Alla, de mi halfinaa fii mon. ³ Ko fejjinaneede mi andiri gundoo on, wano mi windiri non e nder kongudi seedaaji. ⁴ E nder jangugol di, on waaway faamude hakkil ki mi hebi e telen-ma gundoo *Almasiihu on. ⁵ On gundoo fejjinananaooka bii neddanke'en e diya jamaanuuji, wano Ruuhu Alla on fejjinirani non jooni sahaabaabe makko laabube ben e annabaabe ben ⁶wonde: be wonaa Yahuudiyanke ben no kafidi e Yahuudiykeebe ben ndondi wootiri, be bandu mun woni wooturu, tawdaabe e fodaari wootiri ndin e nder humondiral e Iisaa Almasiihu on sabu Kibaaru Moyýo on.

⁷ Ko on Kibaaru Moyýo mi wontani kurkaadu sabu dokkal sulfu Alla mo mi yediraa bawgal doole makko den. ⁸ Ko min, oo burdo hayfude e hakkunde yimbe Alla ben fow yedaa ndee moyýere: dun ko yottingol e be wonaa Yahuudiyanke ben Kibaaru Moyýo fii ngalu Almasiihu ngu alaa kattudi ngun, ⁹ e fejningol fensita no Alla, on Tagudo kala huunde, laatinirta ebboore gundoore mun suudinoonde gila law nden. ¹⁰ Dun, gila jooni, yo laamuji din e bawde den ka kammuuli andu cende faamu Alla mawngu ngun, tippude e *moftal Alla ngal, ¹¹ hara ko no yaadiri e ebboore makko poomayankeere nde o laatiniri Iisaa Almasiihu Joomi men on, ¹² on mo hebirden hettaare fii no badoren Alla e nder

hoolaare sabu gomdinal men ngal.¹³ Awa kadi mido torii on wota maayu bernde hebu on sabu ko mi woni tampude fii mon kon, ko dun woni darja mon.

Fii Andugol Giggol Alla ngol

¹⁴ Kodun wadi si mi jicci yeeso Baabaajo on, ¹⁵ on mo beynguureeji wondi ka kammu e ka leydi din fow inniraa, ¹⁶ fii yo o yedu on, immorde e mangural makko tiidungal ngal, no tiidiniredon ka berde mon bawgal Ruuhu makko on. ¹⁷ Yo Almasiihu on hodir ka berde mon gomdinal mon ngal, yo on tute kadi niibinedon e nder giggol, ¹⁸ fii no onon e yimbe Alla 6en fow waawiron faamirde ko hondun woni yanji giggol Almasiihu on e junndi maggol on e luggeendi maggol on e tooweendi maggol on, ¹⁹ e no andiron ngol giggol Almasiihu feyyitungol kala faamu, fii no heewiron ko woni e Alla kon fow. ²⁰ Ko kanko Alla, mo bawgal mun woni gollude e men on, waawi wadude buri ko toriden mo kon maa ko mijiden kon haa feyyita, ²¹ ko kanko mangural wonani ka moftal immorde e Iisaa Almasiihu on haa e jamaanuuji din fow haa poomaa. Aamiina!

Fii Wonugol Gooto ka Moftal Iisaa

4 ¹ Awa, mi wakkilinii on, min oo kasoojo sabu humondiral an e Joomi on, uuurugol ngurndan yaadudan e noddaandu ndu noddadon ndun, ² e nder yankinaare e no newori e yondinaare fow. Muunjondiranee e nder giggol.³ Etee no tabintiniron pottal, ngal Ruuhu on yedata, e nder buttu yubbindirdo on on.⁴ On fow on hebii Ruuhu gooto, on laatike bandu wooturu, wano tawiri non kadi hidon mari tama'u gooto mo noddiradon fewndo noddadon on.⁵ Ko Joomi gooto kadi woodi, e gomdinal gootal, e *lootannde maande kisiyee wootere, ⁶ e Alla gooto woodi, dun ko on Baabaajo fow, on Wondo dow fow e hakkunde fow e di fow.

⁷ Kono mo kala e men yedaama moyfere nden, embere dokkal ngal *Almasiihu on yedi en ngal.⁸ Kodun wadi si no wi'aa:

«O yawii ka asama,
o nabori maccube,
o wadanii yimbe ben dokke.»^a

⁹ (E hin-le ko hondun «o yawii» firi si wonaa wonde o tippike haa ka nokkeeli burdi luggude ka leydi? ¹⁰ On non Tippiido, ko on yawi e dow kammuuli din fow, fii hebbingol kala huunde.) ¹¹ Ko kanko yedi wobbe wonugol sahaabaabe, wobbe ben wonugol annabaabe, wobbe ben fejninoobe Kibaaru Moyyo on, wobbe ben aynoobe e jannoobe, ¹² fii hebulingol yimbe Alla ben fii golleeji kurkagol ngol e fii tiidingol bandu Almasiihu on^{b13} haa en fow yubbondiren e nder gomdinal ngal e andugol *Biddo Alla on, mawnen, wonen mokobaabe, haa hewten mawnannde tooweendi ko woni e Almasiihu on kon fow.

¹⁴ Dun, hande kadi en wontataa faybe yiilindirteebe, ruynirteebe kala noone janndeeji di yimbe ebbiri yoyre e kuude mabbe daynooje. ¹⁵ Kono, wowlugol goonga e nder giggol, en mawnay e kala huunde e telen-ma on wondo hoore, dun ko Almasiihu on. ¹⁶ Ko sabu makko tere *moftal wongal bandu makko ndun fottiri tiidi, humondiri moyya ka jokke, de ndu woni e mun. Kodun wadi, nde teral kala wadiri no haanirani dun non, bandu ndun fow mawnay, hettoo e nder giggol.

Fii Ngurndan Kiddan dan e Ngurndan Kesan dan

¹⁷ Awa e hino ko mi wi'ata on, mi andina on e innde Joomiraado on: On haanaa wuuirde han kadi wa be gomdinaa ben, ben jokkubé mijooji mun mehi.

¹⁸ Mijooji mabbe din ko nibbitudi, ko be jananbe e ngurndan Alla dan, sabu majjere mabbe nden e yoorere mabbe bernde nden. ¹⁹ Be alaa leebol liimanaaku few, be jokkii jiibaare, fii wadugol kala ko laabaa ko yubbondiri e himme.

^a4.8 Zab. 68.19

^b4.12 «Bandu Almasiihu on» ko noone wi'ugol «moftal Almasiihu on».

²⁰Kono onon, hinaa non andirdon Almasiihu on.²¹Bay pellet on nanii fii makko no wowlee, on jannaama fii makko ko yaadi e goonga wondo e makko on,²²haray hidon haani bortaade jikku mon feyfudo on e tagudi mon hindi ndin, dun ko on tuuniniroowo on himmeeji faljinooji,²³accon ruuhuuji mon din e hakkilaaji mon din heydintinee,²⁴bornodon tagudi mon heyri ndi Alla tagiri mbaadi mun e nder peewal e laabal ko rimata goonga.

²⁵Kodun wadi ko yo on seedu e fenaande, mo kala e mon yo wowlan dimmo mun on goonga, ko fii ko en tere de bandu wooturu.²⁶Si on aru seytinde, wota on wadu junuubu, haray wota naange ngen mutu hidon tikki.²⁷Wota on jonnu Ibuliisa yolnde.²⁸Wujjaynoodo woo wota wujju han kadi, kono yo o gollir juude makko den e nder nundal, o wada godfun ko nafi, o okkora hatonjindo.²⁹Wota on accu kongol barminoowol woo yalta ka hunduko mon, kono wowlee kongudi moyfayndi tun, addaydi nafa, wallaydi beya mawnugol ka nder gomfinal, dun di waday ko moyyi e hedotoobe on ben.³⁰Wota on aanin Ruuhu Alla *Seniido on, on mo maandiniradon fii ndee nalaande cottudi wonkii.³¹Yo kala metteede e tikkere e monee e sonko e hoyre e kala bonki iwu hakkunde mon.³²Moyfondiree, yurmondiron, yaafondiron, wano Alla yaafori on non sabu Almasiihu on.

Fii Hakkunde Niwre e Ndaygu

5 ¹Awa wonee nemboobe Alla wa faybe yidaabe,²wuuron e nder giggol wano *Almasiihu on yidiri en non. O wattitii kanko tigi e sookeeje Alla fii wonangol en sadaka sakkaado wa angiri uurundi.

³Wota jinaa e kala noone angal laabal maa himme maandine toode e hakkunde mon, bay dii pijji haananaa yimbe Alla ben.⁴Wota haalaaji bondi maa di aldaa e faamu wowle, hay non si ko awmagol, dun hinaa ko haani, kono yo Alla yette.⁵Ko fii, andee fota, kala jinoowo maa mo laabaa maa himmudo, e maanaa rewoowo sanamu, alaa gebal ka *laamateeri Alla e Almasiihu on.

⁶ Awa wota hay gooto daynir on haalaaji mehi, bay ko fii dün tikkere Alla nden ardata e hoore murtube 6en. ⁷ Awa wota on kafidu e maßbe gebal woo. ⁸ Hari ko on nibe, kono jooni ko on ndaygu sabu humondiral mon e Joomiraado on. Awa wuuriree wa faybe ndaygu ngun, ⁹ ko fii ndaygu ngun no funtina kala noone moyyere e peewal e goonga. ¹⁰ Awa hakkilanee e ko welata Joomiraado on kon. ¹¹ Wota on humondir e kuude meereeje woo de nibe, kono fejjninee fii majje. ¹² Ko fii ko 6en yimbe wadata kon e gundoo no hersinii toode hay wowlugol. ¹³ Kono kala ko feeni ka ndaygu, yaltitay, ¹⁴ ko fii ndaygu ngun hentinay fow. Kodun wadi si no wi'aa:

«Finu, yo an daaniido,
immo e hakkunde maybe 6en,
Almasiihu on ndaygay e hoore maa.»

¹⁵ Awa wattanee yiila e ngurndan mondan, hara on wuuriiali wa komoobe 6en, kono ko wa jooma-faamu'en. ¹⁶ Awa wota on accu fajuhun woo feyyira on, ko fii nalaade den ko bonde. ¹⁷ Kodun wadi, wota on wonu faada-hakkilbe, kono faamee ko hondun woni faale Joomiraado on. ¹⁸ Wota on yaru haa mandilon, dün koboylaare, kono hebbinoree Ruuhu Allaahu on. ¹⁹ Yewtiree beyti Zabuura e jaarooje e beyti hormordi. Beytanon, jaaranon Joomiraado on ka berde mon, ²⁰ saa'i kala yetton Alla, on Baabaajo, e kala huunde e innde Iisaa Almasiihu Joomi men on.

Fii Duhiibe e Sonnaabe mun

²¹ Doftondiree e dow teddingol Almasiihu on.

²² Onon kadi, yo sonnaabe, mo kala yo yankinano moodi mun wano yankinorani non Joomiraado on.²³ Ko fii ko gorko woni hoore^c debbo, wano Almasiihu on

^c5.23 Maa: «hooreejo».

woniri non hoore^d *moftal ngal, ngal-le ko bandu makko, ko kanko woni dandoowo ngal.²⁴ Wano moftal ngal yankinorani non Almasiihu on, yo mo kala e sonnaabe ben kadi yankinoran non moodi mun e di fow.

²⁵ Onon kadi, yo duhiibe, mo kala e mon yo yidu sonnaajo mun on wano Almasiihu on yidiri moftal ngal non, haa o okkitiri hoore makko fii maggol.²⁶ O wadiri dun fii no ngal wonira ngal Alla e hoore *laabbinirgol ngal lootirgol ndiyan e daaluyee on,²⁷ fii fenjinoygol ngal moftal darjungal e makko, hara ngal aldaa e waadere woo e nudagol e huunde ko nandi e dun, kono hara ko laabungal, ngal aldaa e ella.²⁸ Wano non kadi, duhiibe ben haani yidirde sonnaabe mun ben waballi mabbe din tigi. Kala on yidudo sonnaajo mun on, haray no yiditii kanun tigi.²⁹ Ko fii hay gooto ajataa bandu mun ndun, kono o namminay ndu, o dankoo wano Almasiihu on wadirani *moftal ngal non.³⁰ Ko fii ko en tere bandu makko.

³¹ «Ko dun wadi si gorko selay ben mun e yumma mun, humoo e beyngu mun, onsay kambe dido be wona gooto.»^f

³² On gundoo no mawni, kono ko hakkunde Almasiihu on e moftal mun ngal mi woni ebbindirde dun.³³ Ko heddi kon, yo mo kala e mon yidir sonnaajo mun on wa hoore mun, awa kadi yo sonnaajo on teddin moodi mun.

Fii Faybe e Mawbe mun

6 ¹ Onon kadi faybe, doftee mawbe monben sabu Joomiraado on, ko fii dun ko ko feewi.² Ko fii «Teddin yumma maa e ben maa»,^e ko yamiroore aranere nden non wondude e fodaari,³ fii no ontigi malira, o heba duubi buy ka hoore leydi.

⁴ Onon kadi non, yo baabiraabe, wota on mettin berde faybe monben, kono ne'iree be waajagol be, eltira laawol Joomiraado on.

^d5.23 Maa: «hooreejo».

^d5.31 Fud. 2.24

^e6.2 Egg. 20.12

Fii Jiyaado e Jeydo dun

⁵ Onon kadi, yo jiyaabe, doftee jeybe on jeyal adunayankewal ɓen e nder kulol e teddungal, e hoore bernde laabunde, wano doftordon *Almasiihu on non. ⁶ Dun non, hara hinaa e gite mabbe tun, maa wano welirta yimbe ɓen non, kono wa kurkaadi Almasiihu on, wadiroobe faale Alla on berde mun den fow. ⁷ Golliranon ɓe anniyee moyyo wa si tawii ko Joomiraado on wondon gollande, hara hinaa yimbe ɓen, ⁸ e hoore andugol, kala jiyaado maa dimo, Joomiraado on yoboyay mo embere moyyi di o wadi din.

⁹ Onon non kadi, yo rimbe, wadiree wano non e telen-ma jiyaabe monben, reenodon e kambugol, e nder andugol wonde Jeydo be on e Jeydo on on no ka kammu, awa kadi yeeso makko gidaale alaa.

Fii Bornagol Aalaaji Iwrudi ka Alla

¹⁰ Ka rawnoode, awa dolnoree Joomiraado on e bawgal makko tiidungal ngal.¹¹ Bornodon aalaaji Alla din fow, fii no waawiron catorde dartoo pehe Ibuliisa den.¹² Tippiro men ngon wonaa hakkunde men e ɓandu e yiyan woni, kono ko hakkunde men e laamuji din e mbawdiji din e laamuji oo aduna wondo e nder nibe e mbawdiji ruuhu yankeeji bondi din ka kammuuli. ¹³ Kodun wadi si mi wi'ay on: yettee aalaaji Alla din fow, fii no waawiron dartorde tuma jalaande bone nden aroyi woo, e fii no waawiron darorde tabita ɓawto wadugol fow.

¹⁴ Awa daree catodon. Yo goonga on wonu dattol keeci mondin, peewal ngal wona dolokke mon hiwitordo on. ¹⁵ Yo pade monden wonu hebulaare iwrunde e Kibaaru Moyyo yedoowo buttu on. ¹⁶ E nder kala huunde, jogoree gomfinal ngal wa hiwitorgo, ngo waawoton danninirde ndagaaje yiite Ibuliisa den fow.

¹⁷ Hippodon kadi kunnawal kisiyee ngal, jogodon kaafa Ruuhu on, kan-le ko daaluyee Alla on. ¹⁸ Saa'i kala torodon wano Ruuhu Allaahu on woni ardorde on

non e kala noone torndeeji, landodon ballal Alla, findinon hakkillaaji mondin fii dun, duumodon e dun fota, toranodon yimbe Alla ben fow.

¹⁹ Toranodon mi min kadi, fii, nde mi udditi hunduko an kon woo, yo mi yede kongudi fii yottingol gundoo Kibaaru Moyyo on e nder cuucal. ²⁰ Ko fii on Kibaaru Moyyo mi wonani nulaado e nder jolokooje. Toranodon mi kadi no mi yewtira pellital, wano haaniranimmī non.

Fii Salminaango ngon ka Rawnorde

²¹ Tikiiki, oo musiddo men yidaado, kurkaadu holniindu e nder golle Joomiraado on, o humpitoyay on no mi fewndori e ko mi woni wadude kon. ²² Ko wadi si mi immini mo haa e mon, ko fii no andiron no men fewndori, e fii yo o buttin berde mon den.

²³ Yo buttu e giggol yede musibbe ben, wondude e gomdinal, immorde e Alla Baabaajo on e Iisaa Almasiihu Joomi on. ²⁴ Yo moyere wonan kala yidirdo Iisaa Almasiihu Joomi men on, giggol ngol bontataa.

ÉPÎTRE DE PAUL AUX ÉPHÉSIENS

en Langue Pular (Fouta-Jalon)

République de Guinée

© 2013 Traducteurs Pionniers de la Bible

en collaboration avec

Mission Protestante Réformée